


Fljamur (Faika) Gagani, dipl.inž.geod.



Dana 15.02.2000. godine, poslije duže bolesti, smrt je istrгла iz naše sredine Gagani Fljamura, dipl.inž.geod.

Sjećanje na kolegu Gagani Fljamura, dugogodišnjeg radnika Geodetskog zavoda u Sarajevu uvijek je bolno među njegovim kolegama i prijateljima.

Rahmetli Fljamur rođen je 20.05.1930. godine u Đinokastri u Albaniji. Osnovnu školu završio je u Đinokastri a srednju školu u Lenjingradu. Visoku vojnu školu – odsjek kartografije završio je u Moskvi 1959. godine.

Godine 1962. dolazi u Beograd gdje se zapošljava u Vojno geografskom institutu gdje radi do kraja 1963. godine kada dolazi u Banja Luku i zasniva radni odnos u R.J. Geodetskog zavoda u Banja Luci. Kao diplomirani inženjer radio je na osnovnim radovima i poslovima premjera, a naročito su značajni njegovi radovi na premjeru gradova Banja Luka, Tuzla i Doboj.

Njegove stručne sposobnosti i primjeran rad stvorili su mu afirmaciju te je 1973. godine premješten u Sarajevo gdje je postavljen za pomoćnika rukovodioca R.J. Kartografija u Geodetskom zavodu koju je dužnost vrlo uspješno obavljao do 1978. godine kada je postavljen za rukovodioca R.J. Inženjerska geodezija.

Kao rukovodilac svoje bogato stručno iskustvo nesebično je prenosio na mlade kolege, a svojom dobrotom i iskrenom ljudskom riječju stekao je veliki broj prijatelja.

Najznačajniji zadaci kao rukovodioca R.J. Inženjerska geodezija bili su izrada katastra komunalnih uređaja za gradove Sarajevo i Banja Luka, koje je vrlo uspješno izvršio a radio je i na projektima izrade komunalnih uređaja za gradove Zenica, Foča, Goražde, Mostar i druge.

Za svoj uspješan rad dobio je Plaketu grada Sarajeva 1984. godine.

Za vrijeme agresije na Bosnu i Hercegovinu dao je veliki doprinos našoj Armiji na pripremi i izradi topografskih karata i reljefa za posebne namjene.

Bio je dugogodišnji član Društva inženjera i tehničara i kroz svoj rad u društvu borio se za bolji prosperitet struke.

Čitav njegov život bio je ispunjen radom i obavezama koje je uspješno izvršavao i kao takav ostaće njegov lik u trajnoj uspomeni među njegovim kolegama i saradnicima.

Iza našeg rahmetli kolege Fljamura ostala je supruga Fada, sin Arben, kćerka Amela i snaha Ermina u vječnom bolu i tuzi za izgubljenim suprugom i ocem.

U ime njegovih kolega i u ime njegove porodice neka mu je veliki rahmet i hvala.

Sarić Šučrija